

इवनिंग डोगरी न्यूज बुलेटिन

समे .18:15 Hrs

<><><><><><>

### Headlines

1. प्रधानमंत्री नरेंद्र मोदी होंरें आखेआ ऐ जे भारत हुन प्रौद्योगिकी दा छड़ा इक्क उपभोक्ता नेई, सगुआं प्रौद्योगिकी बदलाव दा नेता बी बनी चुके दा ऐ।
2. लेफ्टिनेंट गवर्नर मनोज सिन्हा होंरें किशतवाड़ दे चशौती इलाके च हाड़े दी मारै हेठ आए दे परोआरें लेई नमें घरें दे निर्माण लेई नीह पत्थर रक्खेआ।
3. मुखमंत्री ओमर अब्दुल्ला होंरें आखेआ जे दरबार मूव दी प्रथा बहाल होने कन्नै जम्मू ते श्रीनगर बश्कार बित्थ पुरने च मदाद मिलोग।
4. जम्मू सिविल सचिवालय च दरबार मूव दे अज्ज पैहले ध्याड़े ट्रांसपोर्ट मंत्री सतीश शर्मा होंरें अपने मैहकमे दे दफतरें दा निरीक्षण कीता।
5. जम्मू-कश्मीर च कल्लै थमां हौली बरखा ते बर्फबारी दे असार न, मौसम विभाग नै तापमान च कमी दी भविक्खवाणी बी कीती ऐ।

<><><><><><>

### PM-R&D Projects

प्रधानमंत्री नरेंद्र मोदी होंरें आखेआ जे भारत हुन प्रौद्योगिकी दा छड़ा इक्क उपभोक्ता नेई, सगुआं प्रौद्योगिकी बदलाव दा नेता बनी चुके दा ऐ। नमी दिल्ली दे भारत मंडपम च उभरदे विज्ञान ते प्रौद्योगिकी नवाचार सम्मेलन 2025 दा उद्घाटन करदे होई मोदी होंरें आखेआ जे सरकार मुख्य च नवाचार दा आधुनिक तंत्र तैयार करने आस्तै अनुसंधान गी सखल्ला बनाने पर ध्यान केंद्रित करा'रदी ऐ। उनें आखेआ जे दुनिया दे सभनें थमां मते सफल डिजिटल सार्वजनिक बुनियादी ढांचे गी मुख्य च तैयार कीता गेआ ऐ। इस मौके पर बोलदे होई उनें आखेआ

<><><><><><>

### LG-Chishoti Visit

लेफ्टिनेंट गवर्नर मनोज सिन्हा होंरें चिशौती, किशतवाड़ च हाड़ें दी मारै हेठ आए दे परोआरें लेई नमें घरें दे निर्माण लेई अज्ज नीह पत्थर रक्खेआ। इस गैह गी एच.आर.डी.एस. नांs दे इक्क सिविल समाज संगठन दे सहयोग कन्नै तोढ़ चाढ़ेआ जाहग। विधानसभा च बरोधी धड़े दे नेता सुनील शर्मा, स्वामी आत्मा नम्बी ते एच.आर.डी.एस. इंडिया दे संस्थापक सचिव अजीत कृष्णन बी इस नमीं शुरुआत दे मौके

पर उत्थे मजूद हे। ध्यानजोग ऐ जे पाइडर किशतवाइ च आधुनिक ढांचागत सुविधाएं गी बढ़ावा देने दे जतनें गी बल दिं दे होई भारत सरकारै पाइडर च इक आर्मी गुडविल स्कूल ते इक पट्रोल पम्प खोलने दी मंजूरी दिती ऐ। एहदे अलावा सीमा सड़क संगठन - बीआरओ आसेआ अथोली थमां मचेल माता सिड़क तोहड़ी दे हिस्से दा परतियै निर्माण बी कीता जाहग। बीआरओ आसेआ चिशौती च इक नमां पुल बी बनाया जाहग ते बीएसएनएल आसेआ उत्थे नमें 4जी मोआईल टावर स्थापित कीते जाडन।

<><><><><><>

#### CM-Darbar Move

मुख्यमंत्री उमर अब्दुल्ला होरें आखेआ जे सदिएं परानी दरबार मूव आहली रिवायत गी उंदी सरकार आसेआ राजधानी आहली दौनें शैहरें बशकार दी बित्थ गी पुरने लेई बहाल कीता गेआ ऐ। इसी रपे पैसे कन्नै नेई तोलेआजाना लोइचदा। इस रिवायत मुजब सदिएं च सरकारी दफ्तर जम्मू थमां कम्म करदे न ते गर्मिएं दरान श्रीनगर च। मुख्यमंत्री उमर अब्दुल्ला होरें आखेआ जे किश लोक म्हेशा जम्मू ते श्रीनगर बशकार बित्थ पाने दी कोशिश करदे न ते जम्मू बनाम कश्मीर आहली सियासत दा फायदा ठोआंदे न। उनें आखेआ

<><><><><><>

#### CM-Relief Fund

एकता ते समाजी जिम्मेदारी दे इक शानदार प्रदर्शन तैहत भारती स्टेट बैंक दे चंडीगढ़ सर्कल दे मलाजमें जम्मू-कश्मीर जंदे अगस्त म्हीने आए दे विनाशकारी हाईं दे प्रभावितें लेई राहत ते आबादकारी दे जत्नें च मदाद गितै मुख्यमंत्री राहत कोश च 1 करोड़ 55 लक्ख रपे दान दे तौर पर दिते न। एह गैंऽ भारती स्टेट बैंक दे अधिकारिएं ते अमले दी विपदा दी घड़ी दरान खिते दे लोकें प्रति हमददी ते इकजुटता आहली बचनबद्धता गी दर्शादी ऐ। एस.बी.आई दे चंडीगढ़ सर्कल हेठ औने आहली शाखाएं ते दफ्तरें च पंजाब, हरियाणा, हिमाचल प्रदेश, जम्मू-कश्मीर ते लद्दाख शामिल न।

<><><><><><>

#### Offices-Reopen

चार ब' रें दे वक्फे परेंत स्यालै आहली राजधानी जम्मू च अज्ज दरबार मूव आहले दफ्तर खुल्ले। जम्मू पुज्जने परेंत मुख्यमंत्री उमर अब्दुल्ला हुंदा कारोबारिएं ते मुकामी लोकें आसेआ जोरदार सोआगत कीता गेआ। मुख्यमंत्री होरें आखेआ जे उनेंगी एह दिक्खिए बड़ी खुशी ऐ जे लोक दरबार मूव आहली रिवायत दे परतिए बहाल होने करी बड़े मते खुश न। जम्मू दे सिविल सचिवालय पुज्जने पर मुख्यमंत्री होरें गी गार्ड ऑफ आनर बी दिता गेआ। सिविल सचिवालय ते होर दुए दफ्तर श्रीनगर च 30 ते 31 अक्टूबर गी बंद होए हे। दरबार मूव आहली रिवायत गी परतिए बहाल करने आहले फैसले दा सोआगत करदे होई जम्मू चैंबर ऑफ कामर्स एण्ड इंडस्ट्री दे प्रधान अरूण गुप्ता होरें आखेआ

दरबार मूव आहले दफ्तर जम्मू च खुल्लने मगरा मुखमन्त्री होरें अपने मन्त्रिमंडल दी ते प्रशासनिक सचिवें दी इक बैठक लाइयें कम्मकाज दा जायजा लैता।

<><><><><><>

#### Satish Offices Inspection

जम्मू आहले सिविल सैक्रेटेरिएट च अज्ज दरबार मूव दे पैहले ध्याड़े ट्रांसपोर्ट मंत्री सतीश शर्मा होरें अपने मैहकमें तैहत औने आहले सबनें दफ्तरें दा व्यापक निरीक्षण कीता। इस मौके उप्पर सरबन्धत विभागें दे वरिष्ठ अधिकारी बी उं'दे कन्नै हे। मंत्री होरें बक्ख-बक्ख सैक्शनें दा चक्कर लाइयें प्रशासनिक युनिटें दे कम्मकाज दा जायजा लैता। उं'नें सचिवालय च सरकारी कम्मकाज दे बवस्थित ढंग्गै सिर संचालन लेई कीती गेदी तैयारिएं दी बी समीक्षा कीती ते दरबार मूव आहले दफ्तरें दे स्याले आहली राजधानी जम्मू मुंतकिल होने मगरा अमले दिएं तैयारिएं दा बी आकलन कीता। निरीक्षण दे दरान सतीश शर्मा होरें अधिकारिएं ते कर्मचारिएं कन्नै गल्लबात करियें उं'दिएं जरूरतें बारै जानकारी हासल कीती।

<><><><><><>

#### Jhiri-Mela

उत्तर भारत दे सभनें थमां बड्डे मेले झिड़ी लेई तैयारिएं गी मुकदा रूप देई दिता गेआ ऐ। एह मेला कल्लै थमां शुरू होआ'रदा ऐ ते 13 नवंबर तगर जारी रौहग। प्रशासन नै सुरक्षा इंतजामें सने भीड़ दे प्रबन्धन ते आयात सेवाएं दी दस्तेयाबी गी बी यकीनी बनाया ऐ तां जे इस मेले लेई औने आहले श्रद्धालुएं गी कुसै चाल्ली दी असुविधा पेश नेई आवै। इस दरान सांस्कृतिक कार्यक्रम दंगल, झूले ते मुकामी स्टॉल बी लाए जाडन। इस मेले च मुख्य भरै दे अलावा बाहरले देसै थमां बी लोक औंदे न। उपराज्यपाल मनोज सिन्हा होर कल इस मेले दा उद्घाटन करडन।

<><><><><><>

#### GST-Agriculture

करसानें गी बड्डी राहत उपलब्ध करोआने दे मकसद कन्नै केन्द्र सरकारै अगली पीढ़ी दे जीएसटी सुधारें तैहत टैक्स दिएं दरें च कटौती कीती दी ऐ ते इस्से बवस्थ तैहत 18 सौ सीसी शा हेठ इंजन दी समर्थ आहले ट्रैक्टरें पर जीएसटी दी दर गी 12 फीसद शा घटाइयें 5 फीसद करी दिता गेआ ऐ। इस गैह् दा मकसद लौहके ते दरम्याने दर्जे दे करसानें गी सस्ते भाएं पर राई-बाई सरबन्धी मशीनां ते उपकरण उपलब्ध करोआना ऐ। नमीं जीएसटी प्रणाली दे तैहत सरकारै कीड़ेमार दोआइएं, ड्रिप इरीगेशन सरिस्तें, छिड़काs आहले उपकरणें ते खेती आहली मशीनें पर जीएसटी दी दर गी 12 फीसद शा घटाइयें 5 फीसद करी दिते दा ऐ। सरबन्धत अधिकारिएं दा आखना ऐ जे इ' नें हीलें दी बदौलत, फसलें दे उत्पादन च सुधार होग ते करसानें दी औंदन च बाद्दा बी जकीन बनग। इस सरबन्धे च आकाशवाणी कन्नै गल्ल करदे होई इक उपभोक्ता ने आखेआ

<><><><><><>

## National-Integration Tour

भारती सेना आसेआ बन्ने आहले जिलें रजौरी ते पुंछ दे 20एं विद्यार्थिएं लेई 12एं दिनें दे राश्ट्री एकता दौरे दा सरिस्ता कीता गेआ ऐ। फौज दी 25 इन्फैन्टरी डिवीजन दे जनरल ऑफिसर कमांडिंग होरें विद्यार्थिएं दे इस दल गी ए.एल.जी रजौरी थमां झंडी दस्सियै रवाना करोआया। इस पैहलकदमी दा मकसद इ' नें नौजवान विद्यार्थिएं गी देसै दे बक्ख-बक्ख हिस्सें दे बारै च जानकार बनाना ते उ' नेंगी ऐतिहासिक महत्व बारै थाहें ते उ' दी समृद्ध संस्कृति कन्नै अवगत करोआया बी ऐ। इस दौरे दे दरान विद्यार्थिएं गी देसै दे मशहूर शैहें ते फौज दे लॉ कॉलेज ते एनडीए अकैडमी च बी लेता जाहग जित्थे उ'नेंगी उत्थुं दे लोकें कन्नै गल्लबात दा मौका हासल होग।

<><><><><><>

## Weather

जम्मू-कश्मीर च 4 थमां 5 नवंबर बश्कार मौसम आम तौर पर खुश्क रौहग। उच्चिएं धारें पर संझा'लै ते राती हल्की बरखा पेई सकदी ऐ ते बर्फबारी होने दा इमकान ऐ। 4 नवंबर संझा लै किश थाहरें पर बिजली चमकना ते अंधी झक्खड़ झुल्ली सकदा ऐ। दिनें ते राती दे तापमान च गिरावट औने दी मेद ऐ। मुतल्लका प्रशासन आस्सेआ करसानें गी सलाह दिती गेई ऐ जे ओह 4 ते 5 नवंबर गी अपनी गतिविधिं गी रोकिए रक्खन।

<><><><><><>

## Heli-Services

डोडा च अज्जै थमां स्यालै आहली रूतै दे मददेनजर रियायती दरें पर हैलीकाप्टर सेवा शुरू कीती गेई ऐ। पैहली डोआरी दरान त्रै यात्री जम्मू थमां उत्थे पुज्जे जिंदा डिप्टी कमिशनर हरविंद्र सिंह ते डी.डी.सी चेयरमैन डी.एस कोतवाल होरें सोआगत कीता। इस बारै बोलदे होई डिप्टी कमिशनर होरें आखेआ जे इस सेवा दा मकसद बेहतर राबता, सैलसफा गी बढ़ावा देना ते भारी बर्फबारी दरान मेडिकल इमरजेंसीज़ सरबन्धी सहायता उपलब्ध करोआना ऐ। इक भेठा दा कराया 2 जहार 500 रपे रक्खेआ गेआ ऐ।

<><><><><><>